

## LIKLIK PLES I SALIM NIUS

Dia Edita - Mi laik stori long nupela etpos i stap long Halopa Komyuniti Skul, insait long Madang Provins.

Mi meri bilong wanpela skul tisa i stap long Halopa Komyuniti Skul. Mi bin pinisim skul bilong ol nes.

Ol man i save long mi olsem mi gutpela nes tru na ol i bin askim man bilong mi, Mista Benny Sanigum, long mi ken wok nes onogat.

Olsem na ol kaunsila i askim lokal gavman kaunsil long mi ken lukautim etpos hia long Halopa yet. Helt dipatmen bilong Madang i yesa long mi, na tu salim planti marasin bilong wok i kam long mi. Na nau mi wok na lukautim ol skulpikinini na ol manmeri tu wantaim.

Ol pipel-i amamas tru yet long mi i helpim ol long marasin. Mi wantaim man bilong mi, mitupela wantaim i wok long helpim kantri na pipel. Em tasol long dispela liklik nius bilong mi.

Misis Sanigum,  
Halopa/Madang Provins.

*~~~~~*  
Mi Brian Eric Namiat, mi wanpela wokman bilong WANTOK Niuspepa, nau mi laik givim bikpela tok amamas na tok tenkyu i go long dispela meri i stap long potong antap long salim gutpela nius tru i kam long mipela long prinim. Tenkyu.

## LAIKIM TOK PISIN I MAS STAP

Dia Edita - Mi bin harim long redio planti taim tumas ol i tok long senisim Tok Pisin, na bai ol i laik painim nupela nesenel tok ples bilong Papua Niugini.

Long tingting bilong mi, mi i pilim tok pisin em i gutpela long yumi long wanem, planti man na meri na pikinini ol i ken toktok gut long tok pisin stret tasol.

Sapos ol memba bilong Nesenel Palamen i senisim nupela nesenel tok ples, em i bai hat moa long ol pipel bilong Papua Niugini long toktok, na tu, bai i kosim gavman moa mani long lainim ol pipel long dispela nupela nesenel tok ples. Em tasol liklik wari bilong mi.

Augustine Y. Kawa,  
Wapei/W.S.P.

## VILES MEJISTRET MAS WOK GUT

Dia Edita - Sampela taim viles mejistret i save harim kot long wan sait, na em i no harim kot bilong tarangu man long narapela sait. Na bihain bai em i tokim em long baim kot nating na i no harim kot bilong em yet. Dispela em i no stret.

Mi bin lukim dispela kain pasin long hap bilong mi yet, na mi ting dispela pasin i no gutpela. Em tasol.

Joseph A. Kerit,  
Dagua/Wewak.

## YU INAP LONG HELPIM MI?

Dia Edita - Mi save tingting planti long ol pipel na kantri bilong mipela. Ating mi narakain long ol poroman bilong mi long wanem, wari bilong mi i narakain tru olgeta long ol.

Sapos mi i askim mi yet: wanem samting i nambawan tru long laip bilong mi tude? Mi longlong liklik long bekim tok nau ya. I no nap.

I luk olsem nau nambawan samting long laip bilong mi em planti mani bilong baim

kaikai, klos, na ol samting bilong haus. Tasol mi tingting moa na mi tok: sapos mi sik na karim planti pen, bai mani i no inap tru long helpim mi liklik. Nogat ya.

Olsem wanem nau? Wanem samting i win? Mani o gutpela skin? Ating yu tu yu i gat dispela wari? Yu tokim mi, yu save stretim olsem wanem? Mi mas save long en.

Bikpela wari tru bilong mi nau tasol em hia. Olsem wanem bai mi inap stap gutpren wantaim ol wantok, sapos mi no givim olgeta mani long ol? Sapos ol wantok i pinisim olgeta fotnait bilong mi olgeta taim, olsem wanem bai mi ken putim mani long beng long baim skul bilong ol pikinini?

Inap long mi ken tok nogat long wanpela wantok i singaut long mani o kaikai? Mi no save. Mi wari moa. Ating yu save a? O yu ting wanem? Sapos yu gat dispela wari bilong mi, bai yu inap stretim olsem wanem tru ya?

Yu rait long Wantok na yu tokim mi gut nau. Tenkyu.

Pita Wunumo,  
Madang Provins.

## WE STAP OL INKAM TAKIS MANI

Dia Edita - Husat man i save bosim o lukautim inkam takis bilong ol wokman na ol wokmeri, em ol i save wok long ol bisnis kampani long olgeta taun stua long kantri bilong yumi PNG?

Taim bilong fotnait, oltaim ol bosman husat i save bosim dispela kampani i save rausim o katim sampela mani bilong fotnait pe bilong ol boi na givim i go long takis bilong gavman na ol i no save kisim bek hap mani bilong ol long dispela inkam takis bilong ol hia.

Mi gat wari long mi yet, na mi rait na askim Wantok Niuspepa. Na mi laikim bai Wantok Niuspepa yet i ken bekim dispela askim bilong mi. Askim bilong mi em i go olsem. Olsem wanem mi yet

mi i bin wok olsem wanpela stuakipa insait long wanpela stua, inap long wanpela yia na 4-pela mun pinis. Na mi no kisim inkam takis bilong mi long olgeta fotnait bilong mi. Ol i go we tru?

Oltaim masta bilong mi i save rausim o katim K3.50 long fotnait mani bilong mi na i givim i go long takis bilong gavman. Na olsem wanem na mi no save kisim bek hap mani bilong mi long inkam takis bilong mi nau?

Na tu mi i no bin kisim ol sampela pepa o fom bilong inkam takis bilong mi, bai mi ken filim fom na mi salim i go. Na bai inkam takis bilong mi i kam, na bai mi i kisim bek hap mani bilong mi long inkam takis bilong mi long olgeta yia.

Olsem na mi rait na askim yupela ol bratasusa long Wantok Niuspepa bai yupela i ken bekim dispela askim bilong mi insait long Wantok Niuspepa yet, na bihain, bai mi ken ritim long Wantok Niuspepa, na mi ken kisim kliapela na stretpela tingting. Tenkyu tru Edita.

Edmund Tamel  
Yassip/I.S.P.



## MASKI DRING NA PAITIM MERI

Dia Edita - Mi i no save long olgeta haus sik. Tasol mi lukim long Westen Hailans Provins, planti man ol i save dring bia na paitim meri bilong ol na planti ol meri moa i save kisim bikpela sik tru. Sampela ol i save stap long haus sik moa long 2-pela mun, na sampela ol arapela meri 3-pela man.



Dispela samting meri i no tok olsem, man yu go na yu dring bia. Nogat tru. Man em yet i go na dring. Olan, spak bilong em i no isi ya. Na em nau i kam long haus, em i hamaim meri bilong em, o pikinini bilong em. Na sampela klostu ol i laik indai, tasol, ol dokta ol i save wok hat nogut tru long ol, na bihain bambai ol i save kamap orait gen.

Mi laikim ol plis i mas kalabusim ol dispela kain man long planti mun moa, na bai ol i ken pilim na tingting. Long wanem, meri na pikinini i no tok na yu go dring na bihain, yupela i kam na paitim ol meri bilong yupela yet.

Bihain meri i stap long haus sik ol man i save i go na grisim meri bilong narapela man. Na narapela man i kirap na em i tok: em meri bilong yu a? Nau tupela i pait. Na wantok bilong narapela ol i kirap, na bungim em. Nau em ol wantok bilong narapela i kirapim bikpela pait moa namel long ol yet.

Na ol i tok: yu man tru a? Ol lain i kirap na ol i kisim spia, akis, na i go kilim wantok gen. Nau ol i givim bikpela hatwok long plis, na tu long bagarapim dispela nupela independen kantri bilong yumi yet.

Mi laikim yu lukim man yu laik dring bia, plis yu mas tingim gut pastaim a? Yu ken bagarapim dispela gutpela kantri bilong mipela. Em tasol liklik wari bilong mi long dispela taim mi laik autim long yupela olgeta.

David Lapaya,  
Kudjip/W.H.P.

#### WARI BILONG HUSAT?

Dia Edita - Yes hia mi i laik toktok liklik long pas em Barnabas bilong Maprik i bin raitim. Pren hia i bin rait na toktok long pe na sindaun bilong ol katekis. Na long sampela arapela man tu ol i save rait na toktok long wari bilong ol katekis.

Ating em i gutpela. Kate-

Raitim pas na salim i go  
long: WANTOK  
BOX 396  
WEWAK

kis i mas sindaun gut. Em taim i senis pinis. Tasol pastaim mi gat askim long mi yet na long yumi olgeta. Bambai yumi putim dispela wari bilong ol katekis i go i go long husat? Wait pater, wait bisop, na wait sister? Sapos olsem, bai i no gat.

Dispela wari bilong ol katekis i mas i stap antap long yumi olgeta pipel bilong Katolik Sios insait long Papua Niugini. Sapos yumi i bilip long God na i laik harim gut tok bilong em, orait, yumi mas stretim wari bilong ol katekis. Olsem bambai ol i ken sindaun gut na skulim tok bilong God moa gut long yumi. Mas-ki tok long pater, bisop, o husat ol lain pipel olsem.

Ol tu i wok long sios bilong Papua Niugini. Mipela i mas traime long mekim gut long ol tu. Bikos ol i save givim moa ful taim tru long helpim yumi gut long tok bilong God.

A.N.Thyng, H.K. Dungit,  
Maprik/I.S.P.

#### BEKIM BILONG FAMILI PLENING

Dia Edita - Mi laik bekim pas bilong Henry Auk bilong Henganofi long Isten Hailans Provins, em i bin tok-tok long Famili Plening. Em i tok long wanpela hap tok olsem, dipatmen bilong Pablik Helt i stapim ol meri long karim ol pikinini.

Mi laik tok olsem PHD i no stapim ol meri long karim pikinini. Na tu mi laik tok olsem Henry Auk em i no save long mining bilong famili plening. PHD i laikim olsem meri i mas karim pikinini na mas i stap 4 o 5 yia pinis, orait, em i ken karim narapela gen.

Meri i no ken kisim pikinini long olgeta yia. Em i olsem bai wanpela pikinini i no strong yet long wokabaut na em i karim narapela gen. Em bai mama i hatwok tru long lukautim ol. Na tu bai em i no givim inap kaikai long ol. Na dispela bai kamapim sik Malnutrisen. Na long dispela sik PHD i tok, man na meri i mas tingting na makim hamas yia pinis, orait, kisim narapela pikinini.

Henry Auk i tok tu olsem God i blesim ol manmeri na

animal, bikos em i wokim ol. Yes dispela em i tru tasol God i no tok na em i no bin wokim manmeri long karim pikinini olsem kakaruk i putim kiau. God i wokim ol manmeri na putim gutpela ol tingting long ol long plening gutpela sindaun wantaim famili bilong ol oltaim.

Kennth Kanagui,  
Keram/I.S.P.

#### PUTIM GUT PRAIS LONG MAKET

Dia Edita - Wanpela taim mi wantaim ol poroman bilong mi, mipela i go long Wewak Maket na mipela i bin lukim wanpela meri i putim ol samting bilong em, na i sindaun na i was long ol i stap.


Nau mipela i go askim em long prais bilong samting long baim na em i tok olsem: askim long wanem yu baim tasol. Tru, em i stret long tok olsem o nogat? Tasol mi ting em i no stret.

Harim: yu mas putim gut prais bilong ol samting, o-

rait, mipela i ken baim, Em i no stret tru long mekim dispela kain tok olsem hia.

Yes ol wantok long olgeta provins long Papua Niugini, yupela i harim dispela em i stret o i rong? Tingim gut.

So em tasol liklik wari bilong mi em i inap olsem.  
Alphonse Ukamit,  
Bongos/I.S.P.



## TU MINIT TINGTING

### MAK SAVE BILONG GOD

Mipela man i save planti samting. Mipela i save mekim planti samting tu. Mipela save pinis long go wokabaut antap long mun yet. Tasol wanpela samting mipela i no inap wokim: em laip tasol. God wanpela tasol inap. Em wanpela i gat dispela pawa.

Na olsem wanem waitman na blakskin na kakaruk na pik - olgeta wantaim i kaikai kaukau. Tasol yu lukim olsem wanem dispela kaukau i kamapim narapela kain gras long waitman na blakskin na pik na paul. Olsem wanem? Husat i save? Husat inap? God wanpela tasol. Em i mak bilong em.

Na husat i skulim ol pisin long wokim haus? Olsem wanem yu go insait long ai bilong narapela man na olsem em i lukim yu? Na olsem wanem ol tok bilong redio i flai nabaut long win na i kam insait long haus bilong yu na yu kisim? Husat i mekim gurria? Husat i mekim klaut i lait? Husat i wokim raunwin? Em God wanpela tasol; olgeta dispela samting i mak bilong em yet.

Yumi lukim na yumi ken ting: em nau, God i stap. Na yumi no ken longlong na tok: i no gat God. Ful tasol i save tok olsem. Ol saveman i save pinis.

Tri na pis na pusi na sayor - ol i no save long dispela wok bilong God. Tasol yumi man, yumi gat tingting; yumi tasol inap tenkyu long God. God i wetim dispela tenkyu.


Olsem Sam 19 i tok:  
"Olgeta samting bilong heven na graun i mak bilong God".




# TEACHERS CORNER

## FACTORY WORK IN P.N.G.

Social Studies Broadcast, Grade VI, July 26



(Madang) Cutting logs into small pieces, to make paper.




(Madang) A machine which rolls tobacco into cigarettes.

(Lae) This machine turns wire into nails.



(Lae) This baker has machines to bake his bread.



(Madang) Making new letters for a printing press to use.

BONEA PIKSA

*Heldsbach, Finschhafen*

BONEA PIKSA EM I NAMBAWAN PLES LONG PAPUA NIUGINI  
LONG BAIM OLGETA KODAK FILM.

PE I STAP DAUNBILO TRU TRU.

NA TU LONG BONEA PIKSA MIPELA SAVE WASIM NA PRINIM  
PIKSA I KAMAP NAIS TRU.

INAP YU KISIM FRI FILM TU.

Sapos yu laik save moa long dispela wok, orait, yu  
salim pas i kam long:

BONEA PIKSA, HELDSBACH

P.O. BOX 217

FINSCHHAFEN




# 9000 DAI

Las tok i bin kamap i tok samting olsem 9000 pipel i bin dai long Irian Jaya long wanpela guria i bin bagarapim ol Hailans bilong ol long tupela wik bipo.

Olsem wanem ol i bin kamap long dispela namba, man i no save, long wanem planti pipel i bin ranawe i go long bus, na husat inap kaunim?

Ol i tok guria i bin bagarapim ples ol i kolim Babilim Veli long hailans. Gavman i tok ol i bin painim 420 bodi pinis na planti ol maunten i bin pundaun karamapim ol pipel. Gavman i tok tu, bai ol balus i go bringim 15,000 pipel i kam ausait.

Namba wan taim guria i bin kamap long nait yet na bihain liklik, wantaim moa. Gavman i tok 15 viles i bin lus pinis na ol haus na ol bris na tupela ples balus i bagarap olgeta. Planti ol maunten i bin kapsait i kam daun, karamapim ol pipel. Ol arapela kantri i no harim dispela nius inap nau.




## Bilong wanem memba raun nating

MISTA RAPHAEL DOA (lephan), Rijonal Memba bilong Westen Hailans, i bin askim long palamen bilong wanem ol minista i raun nabaut long ol ovasis kantri na pinisim nating ol mani bilong gavman. Ol i no save kam bek wantaim gutpela aidia bilong helpim kantri bilong yumi. Nogat.

Mista Doa i askim bilong wanem planti minista i save go long ol bikpela kantri olsem Amerika na Japan na Australia. Ol i no bin painim hat liklik long mekim go het kantri bilong ol. Ol inap tru long olgeta samting. Mobeta ol i go lukim ol kantri olsem Tailan na Malaya na Kenya, long wanem ol lain kantri ya i wankain long PNG.


## Buy the brand you can trust



DISTRIBUTED IN PAPUA NEW GUINEA BY  
HAGEMEYER (AUSTRALASIA) B.V.

# maxell LN C90

Low Noise Cassette Tape



P.O. Box 673, Madang  
Phone: 822445


P.O. Box 63, Rabaul  
Phone: 922633

P.O. Box 1428, Boroko  
Phone: 56144

P.O. Box 90, Lae  
Phone: 423200

# JVC MUSICAL PLEASURE


## wanpela bilong yu stret



9437



9303E/R



9302E/R



9425

Olgeta samting yu laik painim insait long wanpela kaset redio rikoda, em yu ken painim long JVC.

Ol i no hevi, ol i isi long karim nabaut. Na ol i gat gutpela lautspika tru.

Yu go lukim long Hagemeyer bai yu inap painim wanpela bilong laik bilong yu stret. Na em bai stap planti yia moa. Yu laik win, yu kisim JVC.

**9302E/R** For people with get-up-and-go. Rich, clear sound, automatic level control, variable sound monitor, built-in microphone, flexible 3-way power system.

**9303E/R** Sturdy radio cassette recorder with best quality, solid state sound reproduction. Automatic level control, cue and review facilities. Mike mixing with independent volume control.

**9437** Eye catching 3 Band Radio Cassette Recorder. Push button operation, built in microphone, auto stop, tape counter, tone control, variable monitor mixing.

**9425** Advanced Radio Cassette Recorder featuring 2 speakers, Powerful "5" woofer 2" tweeter cellular horn, input mixing, auto stop, tape counter, built in microphone, AC/DC operation, auto head cleaner.



DISTRIBUTED IN PAPUA NEW GUINEA BY  
HAGEMEYER (AUSTRALASIA) B.V.

For further information write to:-

P.O. Box 673, Madang  
Phone: 822445

P.O. Box 63, Rabaul  
Phone: 922633

P.O. Box 1428, Boroko  
Phone: 25 6144

P.O. Box 90, Lae  
Phone: 423200





# Pasin bilong bekim tok long askim bilong inkam takis

## Tok i go pas:

Ol tisa na ol pipel i wok long gavman o wanpela kompani, bai ol i kisim Grup Setifiket long bosman bilong ol insait long dispela mun yet. Kisim pinis, orait, go kwik-taim long pos ofis bilong yu na askim ol long wanpela PEPA BILONG INKAM TAKIS, PEPA FORM S. Hariap. Yu mas bekim dispela pepa insait long mun Ogas yet. Nau WANTOK niuspepa i laik helpim yu long bekim ol tok bilong en. Nau yu holim dispela pepa klostu. Mipela bai bihainim ol namba i stap long lephan arere bilong wan wan pes.

## PES WAN

Yu bekim ol dispela askim, inap long TOK TRU OLGETA. Larim TOK TRU OLGETA yet, na kalap i go long

## PES TU

- (1) Olgeta tok bek bilong dispela namba yu ken painim long Grup Setifiket.
- (2) Dispela namba i min, sapos kompani o gavman i givim fri kaikai o haus long yu, yu sevim hamas mani?  
(Sapos kompani o gavman i no givim kaikai o haus, tasol em i givim yu mani bai yu yet yu ken baim, dispela tok bek i kam daunbilo long namba (b).)
- (3) Hia ol i askim: yu save kisim o winim mani long sampela arapela we, olsem:
  - (a) Sapos yu gat mani long beng, interes i hamas ?
  - (b) Sapos yu salim hap graun, o haus, o ka samting, hamas mani i bin kamap?

Em tasol. Yu no bekim moa tok long dispela pes...Nau yu kalap i go long -

## PES FOA

Hia ol i laik save: long dispela yia yu bin kisim sampela mani long sampela arapela we yet? Olsem ....

- (15) Sapos wanpela man i dai na mani bilong em i kamap long han bilong yu nating. Hamas mani?
- (16) Sapos ol man i baim rent long haus o graun bilong yu, yu kisim hamas olgeta?
- (17) Sapos yu gat sea long developmen beng o long Bougainville Kopa o kain kompani olsem, yu kisim hamas winmani long dispela yia?
- (18) Sapos yu gat mani long beng, yu kisim hamas winmani long en long dispela yia?
- (20) Nau yu bungim ol dispela namba yu bin raitim long banis long raithan antap, na sam i kamap long ol, yu raitim long arere bilong lain i tok: TOTAL PROPERTY INVESTMENT.

Long dispela neks hap i gat sampela moa we long tekewe long takis bilong yu. Sapos yu gat hap graun o gaden o trak o haus samting - na yu save winim mani long ol dispela samting (tasol i no bisnis tru), yu bekim ol tok nau

- (21) Yu bin peim hamas takis long dispela graun o haus?
- (22) Yu bin lusim hamas mani long fiksime haus?
- (23) Yu baim insurens bilong haus o trak? Hamas?
- (26) Yu peim rent long haus o graun? Hamas?
- (29) Hia yu bungim ol namba i bin kamap long bekim bilong long ol namba 21 inap 28. Na sam bilong ol yu raitim long arere i tok: TOTAL PROPERTY DEDUCTIONS.
- (30) Nau kisim namba i stap long lain (20) na tekewe namba i stap long lain (29) long en. Nupela namba yu putim nau long arere bilong lain (30).  
ORAIT, NAU LUKAUT: YU KISIM DISPELA NAMBA YU BIN PUTIM LONG LAIN (30) NA YU RAITIM GEN LONG ARERE BILONG LAIN (4) LONG PES 2.

## NAU YUMI STAP GEN LONG PES TU

- (5) Nau bungim olgeta namba i stap long arere, stat long namba (1) i go inap long namba (4). Nupela sam nau i

kamap long (5) Ol i kolim: NET INCOME.

- (6) Hia i gat sampela samting moa yu ken tekewe long ol takis bilong yu.  
"Union Fees" - Sapos yu bilong wanpela yunion o asosiasi na yu mas baim fi; orait raitim hia.  
"Subscription" - Sapos yu tisa o wokman na yu baim olkain buk bilong helpim wok na save bilong yu, nau yu raitim prais bilong ol hia.  
"Other Deductions" - Sapos yu baim olkain tul bilong wok bilong yu, o yu lusim mani long rent bilong haus bilong yu, em i hamas long dispela yia?
- (7) Hia yu bungim ol dispela namba nau tasol yubin raitim. Sam bilong ol, em TOTAL DEDUCTION.
- (8) Nau tekewe sam bilong namba (7) long sam bilong namba (5). Na nupela namba i kamap long namba (8). Em ol i kolim: TAXABLE INCOME.

## NAU YUMI KALAP I GO LONG PES TRI.

### Tok i go pas.

Dispela yia gavman i helpim wokman i marit na i gat pikinini, o em i save helpim haikul fi, o i gat sikman wanblut i stap wantaim em, o papamama i stap. Sapos GROSS TAX bilong dispela man i aninit long K300, orait dispela wokman i ken tekewe K30 long wan wan pipel olsem i stap ( i go moa long ? )



## TAXATION OFFICE

### PASIN BILONG BEKIM INKAM TAKIS Bilong yia 1975, 1976

#### FORM S - BILONG OL MANMERE I KISIM PE O WINIM MANI LONG WOK BILONG OL. TASOL OL I NO WOK BISNIS.

Yu mas bekim bipo 31 Ogas.

( Lukaut: Yu mas salim dispela ripot i kam wantaim olgeta grup setifiket. Na yu mas raitim nem olsem yu bin raitim long ol arapela yia. No ken senisim nem)

#### FORM B - BILONG OL BISNISMAN

Yu mas bekim bipo 31 Ogas.

#### FORM C - BILONG OL KAMPANI

Yu mas bekim bipo 31 Ogas.

Sapos yu bin salim ol pepa bilong takis i go long ofis long Port Moresby, yu mas wet lik-lik bipo ol i bekim tok o sampela mani i kam long yu. Sapos yu no bin raitim gut ol dispela pepa, yu bin pasim rot bilong ol long mekim dispela wok hariap.

#### SAPOS YU BOSIM PLANTI WOKMAN.....

Orait, grup rekonsiliesen bilong yu i mas kamap long ofis takis bipo long 14 Ogas. Na lukaut long nupela lo i bin stat long 1 Julai, 1976.

Mi (J.W.Lohberger) Hetman bilong takis.



**PASIN BILONG BEKIM TOK LONG ASKIM BILONG INKAM TAKIS**

( i kam long pes 6 )

aninit long em (dependent). Tasol em i ken kaunim 4-pela tasol. Moa nogat. Na olgeta mani em i tekewe long takis bilong em, i mas kam aninit long K250.

Nambawan bikpela samting i go long olgeta wokman, maski marit o nogat, em samting ol i kolim PERSONAL REBATE. Em i 10% olgeta wokman i ken tekewe long GROSS TAX bilong em. Tasol dispela i mas kam aninit long K250.

Orait, nau yu bekim tasol olgeta askim i stap long namba 9, 10, 11, 12, 13.

ORAIT, NAU YUMI BIHAINIM GUT TRU DISPELA EKSAMPEL BILONG PAINIM TAKIS I STAP LONG PES TRI.

Em i eksampel bilong wanpela wokman i kisim pe inap long K2394 long wanpela yia. Man ya i marit na i gat wanpela pikinini.

Olsem wanem nau yumi painim takis bilong K2394?

Brukim namba 2394 i go long  $\frac{2300}{\text{"A"}}$  na  $\frac{90}{\text{"C"}}$  na  $\frac{4}{\text{"D"}}$   
Long READY RECKONER painim long

Orait, nau yumi go bek bihainim wok bilong ol.

TAXABLE INCOME:	K2394	
Takis bilong K2300 (painim long "B")	=	K156.00
Takis bilong K90 (painim long "C")	=	10.80
Takis bilong K4 (painim long "D")	=	0.48
Bungim ol wantaim :	<u>GROSS TAX</u>	<u>K167.28</u>

Nau tekewe:

10% PERSONAL REBATE	
(Brukim 167.28 long 10)	= 16.72
K30 long meri	= 30.00
K30 long pikinini	= 30.00
	<u>76.72</u>
	<u>- 76.72</u>
<u>NET TAX PAYABLE :</u>	<u>K90.56</u>

( i go moa long pes 10 )



**TAXATION OFFICE**

**LODGMET OF INCOME TAX RETURNS  
1975-76 FINANCIAL YEAR**

**FORM S** — Lodge by 31st August, 1976  
Salary and Wage Earners and those taxpayers who derive income from sources other than a Business.

**NOTE:**  
Lodge **ALL** Original copies of group certificates and write your names as written on previous taxation forms.

**FORM B** — Lodge by 31 August, 1976.  
Business Men.

**FORM C** — Lodge by 31 August 1976.  
Companies.

Taxpayers are requested to allow a reasonable time for processing returns before contacting this office. Delays will occur in issuing refund cheques and assessments in cases where the return is not completed correctly.

**GROUP EMPLOYERS**

Group reconciliation statements must be lodged at this office by 14th August, 1976. Please note new schedules of Tax rates apply from 1 July 1976

(J. W. LOHBERGER)  
Chief Collector of Tax.

**Buy the brand  
you can trust**

**maxell®**



DISTRIBUTED IN PAPUA NEW GUINEA BY  
HAGEMeyer (AUSTRALASIA) B.V.

P.O. Box 673, Madang  
Phone: 82 2445

P.O. Box 63, Rabaul  
Phone: 92 2633

P.O. Box 1428, Boroko  
Phone: 25 6144

P.O. Box 90, Lae  
Phone: 42 3200






# CHOOSE A CAREER WITH

# ELCOM




**APPRENTICE IN TRAINING**



**ENGINEERING CADETS**



**APPRENTICE ELECTRICIANS**



**APPRENTICE LINESMEN**



**APPRENTICE CLERK**

The Papua New Guinea Electricity Commission wants to hear from young men who have completed Form IV and are interested in a career with a future.

The Commission would also like to hear from young men who have completed their second year at the University of Technology in either Accountancy, Electrical or Mechanical Engineering and are interested in taking up a Cadetship with Elcom.

If YOU have the above qualifications and are interested in a lifetime career, write for further information to:

**The Recruitment Officer,  
Papua New Guinea Electricity Commission,  
P.O. Box 1105,  
BOROKO.**



# OK TEDI

OK TEDI em i wanpela biknem yumi save harim long nius. Long dispela hap, insait long ol Sta Maunten long Westen Provins, longwe moa long nambis, ol i bin painim planti kopa moa. Em i winim Bougainville Kopa tru. Tasol em i hatwok moa long go insait hia. Yu ken flai long balus na helikopta tasol. I no gat rot: Na tu long dispela hap i gat ren olgeta olgeta de. Olsem na ol saveman i brukim het bilong ol long painim we bilong wokim wanpela bikpela faktori insait hia long bus.

Nau i gat wan wan man tasol i stap na ol i boaim hul i go daunbilo tru long graun na ol i glasim gut tru olgeta ston na graun i kam antap. Sampela hul ya i stap long ples nogut, olsem yu lukim long poto antap long raithan. Helikopta long neks poto i soim ol graun na ston ol i bin kisim long hul, nau ol i karim i kam long woksap. Na long poto daunbilo yumi ken lukim tupela saveman i glasim graun na ston. Tupela i bin painim gutpela kopa tru na i gat planti gol tu. Poto daunbilo long raithan i soim kem na woksap bilong ol antap long maunten.

Ok Tedi Developmen Kampani i bin stat long helpim ol lokal pipel insait hia long bus long kisim save long ol skul na wok fama. Sapos kampani i stat, bai planti bilong ol i winim mani. Inap nau i gat 10 viles bisnis grup i wok insait long Klautlan Invesmen Kampani na ol i bin putim K10,000.00 insait pinis. Ol i wet inap samting olsem 33 viles i go insait.


Ok Tedi Developmen Kampani i helpim ol skulboi tu long lukautim 22 bulmakau bilong ol, long wokim komyniti senta, na kisim gut save bai ol i ken kisim gutpela wok.

Kampani ya i bin baim tupela haus long Port Moresby i gat gutpela winmani long en. I gat planti mani liklik long ol Ok Tedi pipel bikos sampela man bilong ol i tren na i wok wantaim kopa kampani; planti tu ol i wokman.





# Balus bilong lokal pipel



\* Long poto antap yumi lukim dispela nupela Nomad balus. Januarius S'ami bilong Wantok i bin potoim em long Boram.

Long namba 14 de bilong save bosim ofis bilong ol. mun Epril, Mista Peter Brown wantaim meri bilong em Cecilia na Mista Rick Bennett wantaim Mista Mike Egan ol i kirapim wanpela nupela balus kampani long Wewak, ol i kolim Independence Air Transport Company. Ol i gat wanpela balus tasol. Nem bilong en ol i kolim Nomad. Peter Brown na Rick Bennett i save flaim dispela balus. Mike Egan em i ensinia bilong ol, na Cecilia em i

Nomad inap karim 13 pipel na 3,000 paun kago na em i save flai namel long Is na Wes Sepik, na tu ol arapela ples balus long PNG. Nupela balus kampani hia i bilong ol lokal pipel stret. Nau, i moa long 270,000 pipel bilong Is Na Wes Sepik i gat sea o hap bisnis bilong ol long dispela balus kampani. Balus hia i bin kos olsem K400,000 olgeta long baim.

PASIN BILONG BEKIM TOK LONG ASKIM BILONG INKAM TAKIS  
( i kam long pes 7 )

ORAIT, NAU YUMI BIHAINIM DISPELA EKSAMPEL NA YUMI WOKIM TAKIS BILONG YU YET, olsem bai yu ken kamap long dispela NET TAX PAYABLE.

Nau tasol yumi inap go bek long PES WAN, long hap daunbilo tru, we em i tok WOKAUTIM TAKIS BILONG YU. Nau yumi inap bekim olgeta tok bilong en. Orait, yumi go het nau.

TAXABLE INCOME: - painim long namba (8) long pes 2.  
TAX INSTALMENTS: - Grup Setifiket i tokim yu, hamas mani i bin tekewe long pe. Putim hia.  
TAX PAYABLE: - Em dispela GROSS TAX daunbilo long pes 3.  
PERSONAL REBATE: - (Olsem yu bin raitim long pes 3.)  
DEPENDENT'S REBATE: - (Olsem long pes 3.)  
NET TAX PAYABLE: - Olsem daunbilo long pes 3.

Em tasol, Yu winim bikpela wok pinis. Nau yu bekim tok long banis i tok: TOK TRU OLGETA long pes 1.

Nau salim dispela takis pepa wantaim Grup Setifiket i go long : TAXATION OFFICE, P.O. BOX 777, PORT MORESBY.


Yu no ken wari.

Ol saveman bilong Moresby bai stretim ol asua yu bin mekim. Sapos yu mas salim sampela takis mani long ol, bai ol i tokim yu. Na sapos gavman i mas bekim sampela mani long yu, yu no wari. Bai em i kamap.

Las tok tru em hia:

Sapos yu no inap bekim olgeta tok long dispela pepa bilong inkam takis, orait, yu bekim tasol askim i stap long pes wan na pes tri. Na salim takis pepa wantaim Grup Setifiket bilong yu i go long Moresby. Ol bai stretim.

## INVESTMENT CORPORATION OF PAPUA NEW GUINEA



Poto antap i soim hetman bilong mipela long Rabaul, em John Darby, i toktok wantaim meri i bin baim sampela nupela sea.

YU KEN YUSIM MANI BILONG YU BILONG BAIM SEA INSAIT LONG BIKPELA KAMPANI

- Em i save helpim kantri.
- Em i save helpim yu tu.

Long olgeta beng yu ken kisim moa save long pasin bilong baim sea. O yu ken rait i kam stret long mipela hia:

Investment Corporation  
P.O. Box 155, Port Moresby

Plis, yupela salim sampela tok save i kam long mi, long pasin bilong putim mani insait long Invesmen Koporesen Fan.

NEM: .....

ADRES: .....



# Koprativ lida kibung long Tubiana-Kieta

Long 21 inap 25 Jun i gat 24 deliget bilong PNG na ol Solomon Ailan na Nu Hebrides na sampela arapela kantri wansolwara i bin kibung long Tubiana/Kieta long Bougainville bilong toktok long ol wok koprativ long Pasifik.

Ol i bin pilim olsem: inap nau ol waitman i bin skulim ol tumas long winimani insait long ol koprativ. Na ol i bin lusim ting long ol pipel bilong koprativ. Ol deliget i bin soim long ol kain gutpela eksampel na tu eksampel nogut olsem wanem yumi mas yusim ol pasin na we i isi tumas long ol pipel i ken bihainim.

## BIKPELA WARI BILONG OL

Wanpela bikpela wari bilong wok koprativ em hia: olsem wanem yumi inap long grisim na pulim ol viles pipel i kam insait long dispela wok. Tru tumas, insait long PNG planti koprativ i bagarip pinis i stap.

Ol deliget i pilim yumi mas painimaut pastaim ol pipel bilong wan wan ples i wetim wanem samting i mas kamap long wok koprativ na yumi mas traime helpim ol pipel long winim dispela samting.

## LUKLUK RAUN

Ol deliget i bin mekim tupela lukluk raun. Wanpela long Koprativ long Siwei. Na tu ol i bin raun lukim Kopa Kampani long Panguna. Wanpela visita bilong Nu Hebrides i kalap nogut tru long lukim dispela bikpela faktori.

I tru, em inap long winim bikpela mani; tasol man ya i wari long ol kain we dispela kain wok na mani i ken senisim na bagarapim laip bilong ol lokal wokman.

## MANI I NO NAMBA WAN

Kain program ya em i bilong soim, olsem wanem ol sios bilong PNG i wari long soim gutpela rot long ol pipel long wok bisnis. Mani em i no namba wan samting bilong bisnis. Pipel i namba wan. Na yumi mas wok long bihainim laik bilong ol na helpim sindaun bilong ol.

## OL SIOS YET I STATIM

Dispela woksap i kirap long Pasifik Konpres bilong ol Sios. Siaman em i Pasto Aquilla Yabaki bilong Metodis Sios long Fiji. Em i namba wan taim i gat kain miting long Papua Niugini.

## OL BIKPELA MAN PAIRAP

Bisop Singkai, Pater Mommis, na Dokta Alexius Sarei, em hetman bilong Bougainville, tripela i pairap engens long bikbisnis na mani i bagarapim ol pipel. Ol i laikim koprativ olsem samting bilong liklik man.



Dokta Alexius Sarei (l) na Pasto Aquilla Yabaki.

# KISIM SINGLIS FRI baim National No.1 Radio



RL-295U

Sapos yu baim wanpela NATIONAL PANASONIC radio (RL-195 o RL-295U) bai yu kisim fri wanpela singlis i gat mak na yu kamap smar moa.

**National Panasonic**  
RL-195/RL-295U



"Hi-Top" batteries are made especially for all National Panasonic battery-powered products.



**Burns Philp**  
(New Guinea) Ltd.



# Trik bilong rabisman

Dispela stori bilong tumbuna i kamap long Kaisap long hap bilong Lagaip, Laiagam, Enga Provins. Nem bilong stori Lemian. Lemian em i wanpela rabisman. Em i bin i stap insait long liklik bus bilong maunten Kepau. Narapela hap sait wanpela yangpela meri i stap. Na planti moa yangpela ol man i resis long prenim dispela meri. Husat bai inap long kisim dispela meri.

Man, Lemian i mangal moa yet long dispela meri. Na em i laik traिम long toktok na lap wantaim em. Tasol yangpela meri hia i tok bilas long em na i putim spet long pes bilong em. Na Lemian em i lukim em yet na em i lukim em i rabisman tru, em i no inap long kisim dispela meri. Na tu em i ting mi no gat pik na kina tu. Olsem mi no inap long kisim dispela meri.

Tasol em i ting bai mi i laik traिम painim wanpela rot long kisim dispela meri.

stori bilong tumbuna



Olsem na wanpela taim em i go long hap rot na em i hait i stap klostu long rot. Na em i bin painim yangpela meri wantaim mama bilong em

tupela i lusim ples bilong tupela na i go painim kaikai long wanpela longwe hap. Orait, Lemian i save pinis tupela i kam i go long arapela hap.

Na em i go insait long bikbus tru na em i bin kilim 2-pela kapul, na pasim strong long rop bilong bus. Na Lemian i karim mekpas kapul na wokabaut i go i go kamap long rot, yangpela meri wantaim mama, tupela i bin i go na bai tupela inap kam bek long en. Na long rot namel tru insait long bikbus Lemian i bin painim wanpela haus ston. Na em i putim mekpas kapul antap tru long maunten na i putim longpela rop long mekpas kapul na het bilong rop em i bin putim klostu tru long dispela haus. Draipela paia-wut na target, sayor, olgeta gutpela samting em i putim long longpela rot na i mekim olsem tasol. Na em i painim gutpela hap mambu bilong wokim paia, wantaim stik bilong en. Na em i bin pasim gut long kain lip na skin kapul na long gras bilong kapul. Em i bin mekim samting tru na putim insait long rabis bilum bilong en.

Orait, nau em i wok long singautim ren i kam. Em i tok olsem. "Ren i i i i kam. Ren iiii kam." Em i tok olsem. Olaman, tru bikpela

ren i kamap. Nau em yet i no pilim ren i wasim em na em i go i stap long rot. Orait, mama wantaim yangpela meri i kamap. Na em i sanap olsem sangumaman. Olaman, ren i wasim tupela nogut tru wantaim kol. Lemian i tok hoooo, yutupela i stap we na i kam? Tupela i tok: Mitupela i no inap long toktok wantaim yu, bikos ren i bagarapim mitupela nogut tru. Tasol sapos yu i gat hap mambu bilong wokim paia orait yu ken helpim mitupela, tupela i tok olsem.

Na Lemian i tok: Sori tupela, mi i gat hap mambu bilong wokim paia. Tasol sori, mi i no inap long kisim nating. Bikos em i bikpela samting tru, i no isi. Olsem mi tu mi i pilim kol tasol mi sindaun nating, em i tok olsem.

Na lapun meri i traिम kisim tingting bilong en pinis na em i tok: orait, mitupela bai i painim pik o bilum samting long bekim, yu i orait?

Lemian i tok, nogat. Lapun i tok, yu slip wantaim pikinini bilong mi long wanpela taim tasol i orait? Lemian i yesa.

Nau Lemian i kisim hap mambu long bilum bilong en. Na tupela i lukim mak bi-  
(i go moa long pes 14)

# maxell®

## LONG LIFE BATTERIES



**For all Transistors  
Torches·Tape Recorders  
& Record Players**

HAGEMEYER (AUSTRALASIA) B.V.

P.O. BOX 673, MADANG  
Phone 82 2445  
P.O. Box 63, RABAUL  
Phone 92 2633

BOROKO P.O. BOX 1428  
Phone 25 6144  
P.O. BOX 90, LAE  
Phone 42-3200



# OL OPEN ILEKTORET I SKELIM GUT OL PIPEL O NOGAT

Yunaitet Pati i bin kirap-im planti toktok long senis-im ol arere bilong ol ilektoret. Em i wanpela as tu bilong wanem vot bilong nupela ileksen i bin pundaun insait long palamen.

I gut yumi glasim gut ol dispela samting na lukim wanem samting i tru na wanem samting i mauswara nating.

Pastaim yumi lukim lo bilong kantri, em Konstitusen yet. Em i tok wanem long ol arere bilong ilektoret?

Lukim namba 126 (2) na em i tok olsem: Lo i mas lukaut bai olgeta ilektoret i skel gut. I olsem nogut wanpela i no gat planti man na nara-pela gen i pulap tru.

Orait, WANTOK niuspepa i bin go bek lukim namba bilong ol pipel i stap long wan wan ilektoret long las ileksen. Em hia ol namba na yu ken lukim, klostu ol i wanmak na wankain. Ritim gut.

## BOUGAINVILLE

Sentral.....29,077

Not.....30,288  
Saut.....34,913

## SENTRAL

Goilala.....22,935  
Kairuku Hiri.....25,963  
Moresby Nambis.....30,035  
Moresby Insait.....30,465  
Rigo Abau.....35,369

## SIMBU

Chuave.....29,105  
Gumine.....25,469  
Karimui Nomane.....20,000  
Kerowagi.....28,554  
Kundiawa.....26,810  
Maun Wilhelm.....18,645  
Sinasina.....21,585

## ISTEN HAILANS

Daulo.....25,818  
Goroka.....40,829  
Henganofi.....32,238  
Kainantu.....36,372  
Lufa.....26,733  
Obura.....17,326  
Okapa.....39,251

## IS NU BRITEN

Gazelle.....25,143  
Kokopo.....32,257  
Pomio.....21,463  
Rabaul.....43,444

## IS SEPIK

Angoram.....33,560  
Dreikikir.....19,311  
Maprik.....31,565  
Wewak.....29,835  
Wosera. Gaui.....31,195  
Yangoru Saussia.....28,347

## GALP

Kerema.....32,458  
Kikori.....22,765

## MADANG

Bogia.....27,667  
Madang.....30,699  
Midel Ramu.....30,416  
Rai Kos.....25,818  
Sumkar.....31,242  
Usino Bundi.....23,013

## MANUS

Manus.....22,011

## MILNE BAY

Alotau.....41,154  
Esa Ala.....34,730  
Kula.....27,163

## MOROBE

Bulolo.....32,500  
Finschhafen.....37,000  
Huon Galp.....24,600  
Kabwum.....28,000  
Lae (Butibum).....30,062  
Markham.....28,200  
Menyamyam.....35,200

Nawae.....17,900

## NU AILAN

Kavieng.....27,500  
Namatanai.....29,000

## NOTEN

Ijivitari.....26,200  
Sohe.....31,500

## SATEN HAILANS

Ialibu Pangia.....34,892  
Kagua Erave.....28,462  
Koroba Kopiago.....27,997  
Mendi.....25,914  
Nipa.....26,853  
Poroma Kutubu.....25,143  
Tari Komo.....28,260

## WESTEN

Not Flai.....26,025  
Saut Flai.....39,184

## WESTEN HAILANS

Dei.....20,786  
Hagen.....36,359  
Jimi.....30,677  
Kompam Baiyer.....28,056  
Mul.....20,219  
Tambul Nebilyer.....32,802  
Wahgi.....40,028

## ENGA

Kandep Porgera.....29,894  
Lagaip.....26,033  
Wabag.....37,909  
Wapenamanda.....28,975


## WES SEPIK

Bewani.....21,258  
Apa Sepik.....25,341  
Wapei Nuku.....36,104  
Wes Sepik Nambis.....25,606

YAMAHA

YAMAHA

## NAMBA WAN AUTBOT BILONG SEPIK



# YAMAHA

BAIM LONG

WEWAK - Ela Motors

MARIENBERG -

Katolik Misin

ANGORAM -

Peter Johnson

YU KEN KISIM

PLANTI KAIN

2 HP

5 HP

8 HP

15 HP

25 HP

48 HP

**ELA**  
MOTORS LIMITED

**Burns  
Philp**  
GROUP OF COMPANIES


YAMAHA

YAMAHA



## Pater bilong ol lepraman dai

Pater Antonine Magnani bilong lain bilong ol Fransiskan long Aitape long Wes Sepik i dai pinis long Wewak haus sik long 18 Jun. Em i gat 55 krismas na i bin kam-



ap long PNG long 1952.

Em i bilong kantri Itali na long 1947 em i bin go long Saina, tasol ol Komunis i rausim em long 1951.

Stat long 1959 em i pater bilong haus sik bilong ol

lepraman long Aitape na i go inap em i dai.

Pater i bin helpim ol sik-man long yusim ol han bilong ol long olkain wok bilong mekim wan siling. Em i

skulim ol long samapim klos

na sapim olkain kaving na wokim bilas long skin bilong bulmakau, na wokim sospena olkain bilas bilong nek.

Em i papa tru bilong ol long ol samting bilong God

tu. Em i givim laip long PNG.

## KATIM KAUNSIK TUHAP

Long mun Jun ol pipel bilong Wasu long Morobe Provinces i bin kirapim lokal gavman kaunsi bilong ol yet.

Ol yet i bin putim ileksen long 27 Epril inap long 19 Me. Ol i no laikim pasin bilong Kabwun Kaunsi.

Ol i kros long dispela tupela samting:

(1) Bipo tru Kabwun Kaunsi i bin promisim ol long wokim rot i stat long bus na i kam kamap long nambis bilong Wasu. Tasol inap nau ol i no bin wokim na ol i les long wet moa.

(2) Mani bilong kaunsi takis i save lus nating long developim ol ples maunten tasol, na i no long hap nambis bilong Wasu.

Nupela Wasu Kaunsi i gat 12-pela kaunsi na ol i tokman bilong 6,323 pipel.

Nau Wasu Lokal Gavman Kaunsi i bosim ol hap nambis. Na Kabwun Lokal Gavman Kaunsi i bosim bus long hap bilong ol.

# National Dry-cell Batteries



BATERI em i samting yu ken karim i go long olgeta hap insait long redio o sutlam o teprikoda

BATERI i kostim liklik mani tasol.

NATIONAL BATERI i kam long faktori

bilong ol saveman i wokim ol

NATIONAL redio na kaset redio.

NATIONAL BATERI i no save lik, na

i save holim pawa longtaim.

Yu traim. Yu baim long:

**National**

Distributors: **BURNS PHILP (New Guinea) LTD.**

Available at all Retail Stores.

## TRIK BILONG RABISMAN (i kam long pes 12)

long karamap na tupela i pilim em i samting tru. Orait, tarangu hia em i wok long wokim paia. Olaman, em i taitim bun nogut tru na bikpela paia i kamap. Tasol i no gat paiawut tru.

Lemian i traim tupela na tok: bai yumi kisim paiawut we? Nau tupela i tingting planti. Orait, Lemian i tok gen: yutupela i mas lukluk i go long dua na bai yumi olgeta i ken lukim wanem samting i kamap. Orait, nau, tupela i bihainim tok bilong em na mekim olsem em i tok.

Nau Lemian i isi tasol long holim rop bilong paiawut, kapul, ol sayor, lip tanget, na olgeta samting em i bin mekim redi pinis long en. Tupela i lukluk i stap yet long dua. Nau em i bikmaus na singaut strong. Paiawut, kapul, na olgeta samting i kam daun. Na wantu em i pulim rop i kam daun.

Olaman, tru olgeta samting i kapsait nabaut. Nau em i wok long helpim olgeta samting long tupela. Na tupela i ting olsem em i mekim samting tru. Na lapun meri hia i givim naispela meri nating long em tasol.

(Mipela i no save long nem bilong man i bin raitim dispela stori hia. Sapos yu ting yu, orait rait i kam).



# Rent mas ap - Pe mas antap

**yesa**

**yesa**

MISTA YANO BELO, Minista Bilong Hausing na Saplai, i tok orait long tingting bilong Hausing Komisn long apim ren o takis bilong ol haus. Nau tasol Hausing Komisn i stat long bosim ol haus bipo i aninit long gavman. Na Komisn ya i tok em i no ken kisim mani long gavman bilong dispela wok long sanapim na fiksिम na stretim ol haus. Nogat. Ol pipel i stap long ol haus yet, ol i mas baim long ren bilong ol. Em i mining bilong selp relaiens o sanap long lek bilong yu yet.

Olsem na Komisn i laik apim ren long 50t moa long wan wan wik bilong ol liklik haus na long Kl.50 long ol bikpela haus liklik. Prais bilong olgeta samting i bin go antap, olsem na rent tu.

Long 1975 Komisn i bin sot long K200,000 na ol i laik stretim dispela wari. Nupela wari bilong baim nupela rent bai stat namel long mun Julai. Long arere i gat tok egens. Lukim.


Pablik Sevis Asosiesen, em P.S.A., i kirap nogut long harim nupela aidia bilong Hausing Komisn long apim ol rent.

Seketeri bilong dispela Asosiesen, Mista Jakob Lemeki, i bin tokim ol man i wok long gavman ol i no ken sainim sampela kontrak o pepa wantaim Hausing Komisn long nupela rent.

Em i tok, sapos rent i go antap, orait pe bilong wok tu i mas go antap. Tasol gavman i tok pe bilong ol man i wok long taun i no ken go antap bipo long neks mun Mas. Pe bilong ol man i wok long plantesin samting, yes; tasol long ol taun, nogat.

Olsem na Yunion bilong ol Wokman aninit long hetman bilong ol, em Mista Toni Ila memba bilong Lae, nau ol i laik lus wok na straik long dispela wari bilong pe na bilong rent wantaim.

Tasol ol memba bilong Tisa Yunion na PSA bai no straik.



- long 30t tasol -

CHRISTIAN BOOKSHOP  
Box 169, Wewak



CHRISTIAN BOOKSHOP  
Box 78, Mt. Hagen

Tupela soldia bilong Difens Fos i redi long sutim mota gan. Ol i stap long bus wantaim 600 arapela soldia na ol i skul tru long pait.

Ol i mekim wanpela woa giaman. Ol soldia bilong Wewak 2PIR ol i pait olsem birua na ol 1PIR bilong Moresby i pait egens long ol.

## POSITIONS VACANT

Earn good money, full time or part time selling Mater Home Art Union Tickets. Agents wanted in all major centres. Good commission. Write: MATER ART UNION  
BOX 708, G.P.O.  
BRISBANE (4001)

## BAIM WANTOK

Sapos yu wanpela yu laik kisim WANTOK i kam long yu stret, orait yu salim dispela tiket i kam:

Mi laik kisim WANTOK niuspepa inap wan yia olgeta. Nau mi salim K5 (\$5.00) i kam;

Nem: .....

Adres: .....

Salim i kam long:

**WANTOK - P.O. BOX 396 - WEWAK**



# KING FEATURES SYNDICATE

## The Phantom

®

By Lee Falk and Sy Barry





# Wantok

Digitized version made available by



**Copyright:** Under copyright

**Rights Holder:** Word Publishing Company Limited

**Use:** This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

**Constraints:** This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

**Note on digitized version:** Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.